

中華文史叢書之一
明抄本影印
王有立主編

唐大詔令集

(三)

宋敏求編

台灣華文書局印行

唐大詔令集卷第五十一

宋 宋敏求編

大臣

宰相

館職

張說等監修國史制

宋璟蘇頲修國史制

蕭嵩集賢院學士修國史制

裴光庭弘文館大學士制

陳希烈監祕書省圖書制

齊抗修國史制

李藩弘文館大學士制

牛僧孺集賢殿大學士監修國史制

李固言崇文館大學士等制

魏謩監修國史等制

令狐綯弘文館大學士制

鄭朗監修國史等制

崔慎由監修國史等制

蕭鄴監修國史等制

夏侯孜集賢殿大學士制

白敏中弘文館大學士等制

王鐸弘文館大學士等制

蕭邁監修國史等制

張說等監修國史制

蘇頌

敕古之王者代有史官以日繫月屬詞比事舉而則書用存
有法事而不法是謂空言蓋貶褒之重慎也自非經術文雅
進德修業出忠入孝匡俗佐時爲朕寶臣有邦良輔者孰可
綜覈班紀發揮蒼籀銀青光祿大夫守中書令上柱國燕國
公張說銀青光祿大夫守兵部尚書同中書門下平章事三
品上柱國梁郡開國公姚元之等並可監修國史餘各如故
先天二年十一月二十二日

宋璟蘇頌修國史制

古之良史實難其人掌邦國之事明懲勸之道是以淑駿弘

簡茂先博物爰自重臣式膺兼領銀青光祿大夫守吏部尚書兼黃門監上柱國廣平郡開國公宋璟明允篤誠有犯無隱銀青光祿大夫行紫微侍郎黃門平章事上柱國許國公蘇頲忠肅恭懿察微知章並光我國禎熙我帝載在公聞山甫之頌抗直有史魚之節王言斯典曾是獻替君舉必書亦惟褒貶宜崇鼎鉉之任更述盤盂之篇並可修國史餘如故

蕭嵩集賢院學士修國史制

明乎國史所以弘闡大猷觀乎人文所以化成天下自非鉤深學海囊括詞林盛周公之典謨懸仲尼之日月何以纂敘鴻業允諧僉能兵部尚書兼中書令蕭嵩自天生德惟國之楨孝友溫仁稟於性與明密忠謹自然道合禮樂資其黼藻

風雅由其發揮足以掌書殿之祕文紬史策之徽烈論道而講學司論而記言俾垂作範之規用成不刊之典可兼集賢院學士知院事兼修國史

裴光庭弘文館大學士制

政理鴻業弘之者大賢文儒盛美典之者茂德自非夔龍閒出周孔挺生則無以翊贊經綸發揮圖史者矣侍中兼吏部尚書裴光庭忠公性與禮樂天資爲社稷之臣總喉舌之任儀刑百辟則庶績其凝藻鏡九流則具瞻惟允進規獻替明謨每竭絕編蠹簡成誦不忘固可以論道之餘闡尊儒之義緯經廟堂之略論思祕館之文僉曰爾諧期於予理往膺寵命克昭丕績可充弘文館大學士餘如故

陳希烈監祕書省圖書制

國之載籍政之本源故藏於蓬山緘以芸閣者以爲義府之代纂三五以還皆率茲道也故每加求購冀補遺逸四部名目悉索而采七略條流兼該頗盡豈■羽陵之蠹簡汲冢之殘編如聞頃者以來不存句當或銓次失序或鈎校涉疏或擅取借人或潛將入己因循云久散失遂多思革前弊允資盛德宜令左相兼武部尙書陳希烈充監祕書省圖書爰假丹青之餘以振鉛黃之美則金華侍讀足繼寵於班伯石渠司籍方嗣徽於劉向至公之選可不務乎

齊抗修國史制

權德輿

敕天工人代緝熙庶績所以達四方之志遂萬物之宜王猷

以穆在於宰政君舉必書弘厥史職典領著作允資蓋臣中
散大夫守中書侍郎同中書門下平章事上柱國賜紫金魚
袋齊抗文含大雅行歸中庸弘道而致含章而歸業稽三王
之法志酌千古之獻言積醇粹而外發德輝性自明誠而居
爲國器擢登密勿每竭訐謨察其忠諒多所弘益以序王道
之端辯人事之紀懲勸教化在於春秋錯綜裁成必歸良直
以中樞之餘力得東觀之全才山甫補闕已彰於匪懈臧文
立言佇聞於不朽修明簡策惟爾之休可兼修國史餘如故

李藩弘文館大學士制

敕朕思欲恢弘大化登乎治平翔聲朔於鬼區煥日月於黃
道王綱開而萬寓垂澤泰階平而百神受職叶於夢卜天其

賚予朝議大夫守門下侍郎同中書門下平章事上柱國賜
紫金魚袋李藩德宇凝粹神襟超曠量寬而不入漉滓理當
而不留枝葉行治古之道爲君子之儒溫然玉容流競斯遠
絜矩以居正開誠以納忠起文章之廢滯通天下之惠和內
則褻表良能塞邪枉之路外則銷鑠災患寧黔首之艱廣予
總明弘益良厚言念報禮發乎深衷爰加書圖之職用飭賢
人之光寵靈斯重汝其敬之可兼弘文館大學士餘如故

元和

四年三月
二十八日

牛僧孺集賢殿大學士監修國史制

門下寅亮天工弼諧庶務弘我一德綏撫萬邦佐予冲人以
底於理將推恩於天下必首自於輔臣是用極其褻崇增其

命數訓正圖書之府裁成義例之條銀青之階光於七命茲所以賞勞而馭貴也正議大夫守中書侍郎同中書門下平章事上柱國奇章縣開國子食邑三百戶賜紫金魚袋牛僧孺大玉不琢喬松挺姿文深典謨學貫流略自綸闈掌誥會府貳卿聲實彰華人德歸厚先朝嘉其器業爰命奮庸秉事君之小心蘊難奪之大節往以聖體遼豫潛心保和乃能畫一持平守而不失朕自膺寶歷深仗股肱每申勇退之榮用廣進賢之路損而招益謙乃彌光實簡朕心克諧僉論必能刊魚魯於往籍垂褒貶於國書勉承新恩無替舊服可除銀青光祿大夫守中書侍郎同中書門下平章事兼集賢殿大學士監修國史

李固言崇文館大學士等制

闢至業敷大化實賴乎忠賢逐姦慝去黨比必資於正直非才推閒代道茂經邦則安能秉是鈞衡贊予鴻業朝散大夫守門下侍郎同中書門下平章事上柱國賜紫金魚袋李固言剛毅自任端嚴不同常懷嫉惡之心每負佐時之業頃者姦邪蔽過黨與比連非爾固言孰開予意況面陳至懇章疏繼來辨虞卿宗閔之傾邪明蕭澣李漢之朋附爰付大任益章器能勵乃公忠副予委遇朝議大夫守中書侍郎同中書門下平章事上柱國姑臧縣開國男食邑三百戶賜紫金魚袋賈餗抱忠與義秉直端誠文包經濟之方學達古今之奧自付以樞柄咨其謀猷瀝懇盡規夙夜匡輔竭傳說之啟沃

郎兼兵部尙書平章事監修國史上柱國彭陽縣開國男食
邑三百戶令狐綯上才經邦正德宰物瑚璉重器宜升清廟
之中銀青光祿大夫守中書侍郎兼禮部尙書同中書門下
平章事集賢殿大學士上柱國魏謩直道事主宏國佐時珪
璋瑞姿早耀泰壇之上金紫光祿大夫中書侍郎兼戶部尙
書同中書門下平章事上柱國河東縣開國子食邑五百戶
裴休忠力許國清規立朝鸞鳳異儀高舉重霄之外並富有
天爵深於人文早懷匡濟之資素蘊生靈之望洎處臺位俾
陳廟謨能肩一心以暢萬務識我憂勤之旨罄其弼亮之誠
邊疆寢寧風雨咸若念此丕績懷於深衷今則各新寵章迭
領重職所宜闡清靜玄默之化正褒貶刪詳之業因此嘉命

啟吾規詞夫獻忠言則君受益秉公心則人無怨除吏當則眾職舉下令一則百度美乃吾三后前所施爲也余尙憂屬事重切磨終始不虧乃曰良相綯可守本官充太清宮使驀可守本官監修國史休可守本官充集賢殿大學士散官勳封各如故主者施行

大中九年九月七日

令狐綯弘文館大學士制

門下夫茂育羣生動資良弼緝熙庶績表正萬邦非竭力戴君推誠憂國則何以光膺鼎鉉高步瀛洲十載於茲四方無事昭文講德屬自台臣金紫光祿大夫門下侍郎兼兵部尙書同中書門下平章事充太清宮使上柱國彭陽縣開國男令狐綯保合太和從容中道左右王化清夷國風輔相盡天

地之宜啟沃見忠貞之節直氣能斷嘉猷日新納誨之心義
形於色於戲發號出令表率寰區妙運樞機式弘敷暢山甫
補袞夷吾佐時勉極殊勳書於太室朕以虛懷委遇於道始
終佩服斯言敬承嘉命可充弘文館大學士餘並如故主者

施行

大中九年九月三十日

鄭朗監修國史等制

門下二相股肱與我同體致夷率化致俗清刑致戢干戈致
調風雨垂衣無事良有媿焉得不資刊削之能佇討論之
妙振揚史職開啟儒風予非敢私膺此並命通議大夫守中
書侍郎兼吏部尚書同中書門下平章事充集賢殿大學士
上柱國賜紫金魚袋鄭朗道苞時傑性蘊天和得中庸之隱

微合大雅之明哲大中大夫守工部尙書同中書門下平章
事上柱國賜紫金魚袋崔慎由器稟人秀材爲國植達智者
之變通有良臣之規矩皆學窮閭奧文擅精華辯理必造於
事機吐論同歸於根本松筠挺色莫畏嚴霜鵬鶚凌空自有
俊氣況協贊大政允釐萬方沃心克聞舉直無隱圖是懿效
彰其茂功斯用迭升俾洽嘉命主張懲勸總領典墳必使書
法彌精動契春秋之旨化成爲重豈唯魚魯之文勉弘大猷
罔俟冲驟即可監修國史慎由可充集賢殿大學士餘各如
故主者施行

大中十一年
三月九日

崔慎由監修國史等制

門下惟政之艱非賢勿又用熙庶績實仗羣材頃者所以吁

食宵衣勤求機衡之寄咸得時哲副予虛懷大中大夫守工部尚書同中書門下平章事集賢殿大學士上柱國賜紫金魚袋崔慎由器識淹通風鑑明秀黃香之祇勤彌切壺遂之深衷足稱朝散大夫守尚書兵部侍郎同中書門下平章事判度支上柱國彭城縣開國男食邑三百戶賜紫金魚袋蕭鄴操履清方詞調凝遠孔光之慎密早著山甫之將明可嘉而並宏典墳博通理道亟更顯重雅有風教允副僉諧當茲鈞軸延謀時務稽參政途盡心力以經邦弘禮樂而緯俗羣善必舉庶官乃和可以勒美太常書忠甲令者矣今則三秋式稔四境無虞乃眷股肱厥有成績至於總史官之微婉備帷幄之講求繼美皋夔比良遷董顧茲茂典式示褒優敬爾